

高上玉皇本行集經

卷一







太上洞玄靈寶高上玉皇本行集經

淨心神咒

太上台星 應變無停

驅邪縛魅 保命護身

智慧明淨 心神安寧

三魂永久 魄無喪傾

急急如律令

淨口神咒

丹朱口神 吐穢除氛



舌神正倫

通命養神

羅千齒神

却邪衛真

喉神虎賁

伸氣引津

心神丹元

令我通真

思神鍊液

道氣長存

急急如律令

淨身神咒

靈寶天尊

安慰身形

弟子魂魄

五臟玄冥

青龍白虎

隊仗紛紜

朱雀玄武 侍衛我真

急急如律令

安土地神咒

元始安鎮 普告萬靈

嶽瀆真官 土地祇靈

左社右稷 不得妄驚

回向正道 內外澄清

各安方位 備守帝庭

太上有命 搜捕邪精

護法神王 保衛誦經

皈依大道
元亨利貞

急急如律令

淨天地神咒

洞中虛玄
晃朗太元

八方威神
使吾自然

靈寶符命
普告九天

乾羅荅那
洞罡太玄

斬妖縛邪
殺鬼萬千

中山神咒
元始玉文

我誦一遍
却鬼延年

按行五嶽

八海知聞

魔王束首

侍衛我軒

兇穢蕩盡

道氣長存

五星神咒

五星列照

煥明五方

水星却災

木德致昌

熒惑消禍

太白辟兵

鎮星四據

家國安寧

名刊玉簡

錄字帝房

乘飈散景

飛騰太空

出入冥無 遊宴十方
五雲淨蓋 招神攝風
役使萬靈 上衛仙翁
急急如律令

金光咒

天地之宗 萬炁之根
廣修萬劫 證吾神通
三界內外 惟吾獨尊
體有金光 覆映吾身
視之不見 聽之不聞

包羅天地

育養羣生

誦持萬遍

身有光明

三界侍衛

五帝司迎

萬神朝禮

役使雷霆

邪妖喪膽

精怪亡形

內有霹靂

雷神隱名

洞慧交徹

五炁騰騰

金光速現

覆護真人

急急如

玉皇元降律令敕

玄蘊咒

雲篆太虛

浩劫之初

乍遯乍通

或沉或浮

五方徘徊

一丈之餘

天真皇人

按筆乃書

以演洞章

次書靈符

元始降下

真文誕敷

昭昭其有

冥冥其無

沉滯能自痊

塵勞溺可浮

幽冥將有賴

由是升仙都

長跪禮奉

仰啓玉清境

無上三境尊

仰啓太羅天

無上玄穹主

仰啓三清界

侍宸諸真衆

妙道難思議

造入資玄門

妙經挾玄蘊

導引塵迷趣

臣今淨三業

口誦及心持

唯願大慈悲

開受臣所請

慈光燭卑賤

聰聽聆音聲

願臣諷誦時

響徹十方界

成就一切願 如經所稱述
從此漸進修 成道事諸聖

至心皈命禮

玉清聖境。清微天宮。鬱羅蕭臺之
中。森羅淨泓之上。現有為之梵相。
具無極之神通。敷演真玄。破無有
色空之礙。拯提趣類。絕智愚高下
之分。妙用難窺。靈機罔測。大悲大
願。大聖大慈。無量度人。元始天尊。

至心皈命禮

上清真境。禹餘天宮。紫微瓊臺之
中。玄都玉京之上。接元始虛皇之
統系。超西那玉國之根苗。入黍米
珠。盡挹真玄之精粹。在香林苑。屢
談祕要之筌蹄。妙德難思。神通莫
議。大悲大願。大聖大慈。無量度人。
靈寶天尊。

至心皈命禮

太清仙境。大赤天宮。巍巍金闕之
高。渺渺重霄之上。降生於無量數

劫說法於萬二千天。五千祕言。融
三才之妙道。八十餘度。接六趣之
衆生。聖德崇高。玄功廣博。大悲大
願。大聖大慈。無量度人。降生天尊。

至心皈命禮

妙有真境。彌羅上宮。曩示現國王
之身。即根本帝尊之質。始相湛寂。
實至玄至妙。以難言。嗣位繼傳。妙
無等無倫。而相踵。聖父之慈悲父。
至尊之最上尊。稱讚難窮。皈依莫

盡大悲大願。大聖大慈。光嚴妙樂。
國王聖父天尊。

至心皈命禮

妙有真境。彌羅內宮。慈顏烜春日
之和。懿範凜秋霜之肅。純全梵炁。
先天地以素存。化現妙身。歷后妃
而示應。具一氣胚胎之妙。寓帝身
生化之殊。萬化祖根。衆生慈母。大
悲大願。大聖大慈。寶月光皇后。聖
母元君。

至心皈命禮

紫金闕。白玉京。住妙有之境。
中。處玄真之天上。功成道備。故妙
相卓冠於諸天。心廣體胖。故慈光
遍燭於三界。位尊而上極無上。道
妙而玄之又玄。真聖宗師。天人依
仗。大悲大願。大聖大慈。穹蒼聖主。
玉皇天尊。

至心皈命禮

光嚴國內。妙樂土中。聖母凝神夢

於虛無。道君授玉質於恍惚。慈愛
和遜。弗貪萬乘之尊榮。忍辱仁柔。
不憚億劫之修累。功高無比。德重
難踰。大悲大願。大聖大慈。現無量
功德之身。玉皇天尊。

至心皈命禮

尊居帝位。高處天宮。遍遊於一切。
白玉京中。普現於十方。黃金闕內。
定而能應。去來自在。以無拘合而
可分。變化圓通而莫測。演清淨解

脫之道。濟沉迷幽苦之徒。自然而
然。非識可識。大悲大願。大聖大慈。
現清淨自然之身。玉皇天尊。

至心皈命禮

昔為王嗣。苦建玄功。三千餘劫之
修行。有如一日。億萬生靈之拯度。
廣及十方。雖法身由胎臟之胚渾。
諒聖體由道原之變化。不壞不滅。
杳亡杳存。大悲大願。大聖大慈。現
神明堅固。不壞真空。無上法身。玉

皇天尊。

至心皈命禮

清微天上。太玄玉都。知時至而舉
六神通。分法身而遍十方界。如無
邊鏡。上天下地。悉昭融。出大妙音。
六道四生。皆解脫。表以放光之瑞
相。明茲本行之勝因。蕩蕩難名。巍
巍無上。大悲大願。大聖大慈。分身
應化。玉皇天尊。

至心皈命禮

北極真空。尊居無上。本行皆難行
之苦行。是身即清淨之道身。棄國
出家。施財寶而捨血肉。濟幽及顯。
宣正化而揚神功。教菩薩而悟大
乘。證金仙而入妙道。為慈悲父。誠
大丈夫。大悲大願。大聖大慈。玉帝
應身。清淨自然覺王如來。

至心皈命禮

與諸眷屬。馭八景輿。雖後會於法
筵。實首陳於偈讚。花成寶蓋。悉歸

美於帝光。樂奏洞章。欲溥沾於聖
澤。門五品而先一品。居九天之第
八天。啓白元尊。稱揚上帝。大悲大
願。大聖大慈。經筵啓問。高虛清明。
天主帝君。

至心皈命禮

玉光境內。寶蓋會中。為始祖於諸
天。憫凡夫之短景。請披靈蘊。詣金
闕而咨禁戒之儀。恭對慈顏。出玉
篇而受光明之咒。御乾坤於不約。

制劫運於無窮。符命所臨。烝民獲
壽。大悲大願。大聖大慈。天地始祖
五老上帝天尊。

至心皈命禮

玉光照處。寶蓋會中。啓金闕之元
尊。問玉皇之功德。人天風雨。皆經
力之大恩。江海山林。盡帝名之餘
福。利益十方三界。拯提六道四生。
一頌稱揚。諸天喜慶。大悲大願。大
聖大慈。法筵啓問。玉虛上帝。

至心皈命禮

玉光境內。寶蓋會中。感上帝開利
益之門。為衆生興方便之意。周流
沙界。受真經五品。以誦持。親奉三
音。敕三界十方。而覆護。以孝養恭
敬。而為本。則自在逍遙。而無疑。亶
亶歌辭。巍巍功德。大悲大願。大聖
大慈。經筵啓問。昊天上帝。

至心皈命禮

玉光境內。寶蓋會中。以憂世之心

同。故從座而起問。斷除疑網。使不
為邪障之污。覺悟迷途。知宿有善
緣之雅。以報應神驗之事。警受持
讀誦之人。名十二身。功三十種。大
悲大願。大聖大慈。慈悲度厄真人。
尋聲救苦真人。濟生度死真人。萬
福護身真人。

至心皈命禮

寶蓋會中。玉光境內。從下方而來。
覲知至理之本同。飛八湊香而旋。

遶道前。雨衆妙花而遍覆會上。護
諸國土。冀妙法之福含靈。具六神
通。衛真經而遵救命。大聖大慈。傳
經演教。歷代祖師。神仙聖衆。

至心皈命禮

青華聖境。東極上宮。十方化號。度
衆生。百億瑞光。瞻妙相。即隨機而
赴感。由誓願之弘深。九色蓮花。作
慈航之彼岸。一枝楊柳。開甘露之
法門。無量度人。大慈仁者。大悲大

願。大聖大慈。太乙尋聲救苦天尊。

至心皈命禮

家世相韓。股肱佐漢。身不勞於汗
馬。名已載於丹書。掉三寸舌。為帝
者師。受一編書。作人中傑。進黃石
公履。由志合以道同。從赤松子遊。
遂功成而身退。玉經謄證。寶節疏
榮。大悲大願。大聖大慈。校經主宰。
天樞上相。法主道君天尊。

至心皈命禮

北方淨域。玄武輿樞。始從金闕。以
化身。終輔玉皇。而斷惡。當三三而
降誕。至九九以飛昇。妙行積緣。報
恩經足。知於行願。福神治世。啓聖
記難盡於神功。水火合形。虛危上
應。大悲大願。大聖大慈。北極真武。
佑聖真君。玉虛師相。玄天上帝。終
劫濟苦天尊。

至心皈命禮

本來南土。上泝蜀都。先獲黃帝九

鼎之丹書。後從老君兩度於玉局。
千軸得修行之要。一時成吐納之
功。法籙全能。受盟威品而結璘訣。
正邪兩辯。奪福庭治而化鹹泉。無
愧大丹。兼齊七政。大悲大願。大聖
大慈。三天上相。玄都丈人。扶教度
人。大法天師。正一靜應。顯佑真君。
六合無窮。高明大帝。降魔護道天
尊。

至心皈命禮

終篇獻頌。億劫長存。大悲大願。大
聖大慈。四衆八部。大乘菩薩。梵天
一切金僊。

至心皈命禮

玉光境中。寶蓋會處。是玉女有姝
妙之形體。感天尊垂明了之法門。
遊聖域而聽法音。侍御前而經億
劫。成無上道。以大慈心。大悲心。為
度衆生。同清淨信。清淨解。身香所
及。衆願悉成。大悲大願。大聖大慈。

夜光玉女。一切元君。

至心皈命禮

清微天中寶蓋會上。親究於不二法門之旨。侍宸於舉六通力之先。揚煙散花。有此靈童玉女。清齋建節。無量飛天神王。肖道貌以雖殊。同帝心而罔間。大悲大願。大聖大慈。九千萬人。諸真聖衆。侍衛左右。妙行真人。

至心皈命禮

清微天上。寶蓋會中。挺生浩劫之
初。輔翊玉清之化。得元炁而為體。
號自然之大僊。真筆如椽。紀一丈
天書之字。上清真境。掌五方雲篆
之文。發露機緘。源流符印。大悲大
願。大聖大慈。自然大僊。天真皇人。

至心皈命禮

清微天上。寶蓋會中。班同來會之
十方。名在真經之四品。聆方便利
益之事。俱發聲言。推覆護受持之。

心。如愛身已。總三光五嶽之列聖。
極天上地下之諸真。大悲大願。大
聖大慈。遵奉帝敕。護持經人。周流
沙界。神仙兵馬。無鞅聖衆。

至心皈命禮

清微天上寶蓋會中。嘗面覩於慈
光。亦親聆於妙法。以本行之經教。
萬代流傳。俾後世之民生。一忱受
誦。惟聖聖相承之師匠。使源源不
絕於人天。大悲大願。誕生漢室。錫

號晉朝。惟布炁以降邪。曾吞虎而
救世。管玉霄洞真之法。傳玄室內
教之經。掌雷府形。行都督府便宜
之事。振天師職。升紫微天右相之
班。判保陽宮。主混元教。大悲大願。
大聖大慈。無極真元清皇上帝。九
天寶冊司命天尊。

至心皈命禮

昔降生於周末。應禱尼靈。今主宰
於皇朝。維持聖治。德叅太極。道集

大成。為百世之儒師。作生民之教。主。毋固。毋必。毋我。毋人。刪詩定書。繫易執禮。在在應春秋之化。方方持孝義之經。大悲大願。大聖大慈。先聖至聖。文宣王。興儒盛世。天尊。

至心皈命禮

永平柱史。唐代易玄。得異術以全神。脫塵囂而厭役。主九華之大法。賦百篇之真機。道骨當僊。留馬若入淵之跡。恕心治獄。致鼠飛穿牖。

之祥。受赤龍丹。號碧梧子。大悲大願。大聖大慈。三天次相。九炁丈人。丹霖大帝。無量度人天尊。

至心皈命禮

不驕帝境。玉真慶宮。現九十八化之行藏。顯億千萬種之神異。飛鸞開化於在在。如意救劫以生生。至孝至仁。功存乎儒道釋教。不驕不樂。職盡乎天地水官。功德難量。威靈莫測。大悲大願。大聖大慈。九天

開化主宰。七曲靈應大帝。談經演教。消劫行化。更生永命天尊。

至心皈命禮

由魏迄晉。嗣休炳靈。雖因謫母之符。實應玉皇之譜。留拔宅畫昇之地。開靖廬星布之天。藥壺神丹。職任天醫之上品。鐵樹寶劍。都仙總領於九州。功著斬蛟。德隆咒水。大悲大願。大聖大慈。九州都仙太史。高明太使。太乙定命。至道玄應。神

功妙濟真君。

至心皈命禮

玉珍洞天。丹華仙府。著黃冠垂數
百載。借朱姓為十八尊。挾上足之
長椿。錫下民之遐筭。丹成爐鼎。飛
昇霄漢。以無蹤。星駕雲駢。巡歷山
川。而不礙。貴稱御客。謚證真經。大
悲大願。大聖大慈。神仙感應。妙通
丹華。慈濟文顯真君。定光澄明普
度天尊。

至心皈命禮

神霄玉府。歟火僊都。由元始祖劫。以分真。以一炁應元。而保運。羽翼化工之造。扶持道法之行。受鍊南宮。儼異形而自若。發聲春仲。生萬物以熙然。仁本中存。威藏不測。大悲大願。大聖大慈。雷主中天。歟火律令。炎帝天君。太乙雷聲。普化天尊。

至心皈命禮

神霄青華。猛吏都督。神超三界。佐
帝君以勤忠。威震九天。濟生民之
疾苦。統轄風雷雨部。遍周天地水
司。鐵帽神符。親受承於敕命。銀牙
耀目。誓摧挫於鬼營。降凡壬癸之
辰。運化陰陽之妙。大悲大願。大聖
大慈。雷霆都司元命真君。蓬萊都
水使者。雷聲應化天尊。

至心皈命禮

寶蓋會中。玉光境內。奉上帝之敕

命。作三界之慈航。幹運四時。主張造化。覆護受持。是此經者。滿足所欲。如是願心。十方帝君。諸仙聖衆。神僊兵馬。十極神王。二曜九星。三官四聖。五方星斗。四天門王。周天衆星二十八宿。降魔金剛力士。飛天神王大神。四海九江。五嶽四瀆。山林川澤。井泉溝渠。十二河源。一切主者。法籙吏兵。城隍社令。樹木神衆。土地靈官。護戒護壇。護經護

道。醮筵應感。一切真靈。

長跪朝真。求哀懺悔。

臣等自從無始劫

無明煩惱覆真心

常行殺盜與邪淫

兩舌妄言并綺語

誹謗大乘真正教

聞亂親朋離間人

貪嗔癡暗縱三心

喜怒愛惡增七慢

歷劫罪愆難記憶

多生業垢莫能量

皈投上聖大慈尊

發露真心伸懺悔

萬劫千生諸罪垢

願從懺悔悉消除

將此身心奉上真

惟願罪根悉原宥

懺悔已後。罪滅福生。稽首禮

謝

無上至真三寶。

志心發願

願眼常覩玉毫相

願耳常聞說法聲

願鼻常嗅衆妙香

願舌常讚無上道

願身不染邪淫法

願意常存正信心

發心上報四重恩

發願下濟三途苦

廣運慈悲憐一切
廣行方便度衆生
仰惟玉帝大慈悲
加護願心悉成就
發願已後罪滅福生稽首禮

謝

無上至真三寶。

太上彌羅無上天。妙有玄真境。渺
渺紫金闕。太微玉清宮。無極無上
聖。廓落發光明。寂寂浩無宗。玄範

總十方。湛寂真常道。恢漠大神通。
玉皇大天尊。玄穹高上帝。

禮畢東向端坐誦經

念開經咒

善哉元始 無量度人

演清淨教 登引天真

玄座說法 寂然無聲

玉帝放光 喜慶難名

是為心傳 亦曰天根

大圓滿咒 瑤章洞文

集以成書 敷落神真

臣今東向誦

願與天齊并

存亡俱證果

永度愛河津

太上洞玄靈寶高上玉皇本行集

經卷上

清微天宮神通品第一

道言 元始天尊昔在清微天中。

玉京金闕七寶玄苑。玉皇宮殿。

昇光明座。與無鞅數衆。宣說靈寶。
清淨真一。不二法門。是時。玉皇
尊帝。與諸真聖。飛天大聖。無極神
王。靈童玉女。九千萬人。清齋建節。
侍在側焉。于是。玉帝。知時欲至。
即於會前。舉六通力。放大光明。遍
照諸天。無極梵剎。一切境界。皆大
震動。十方無極。一切世界。俱同琉
璃玻瓈。無有隔礙。十方來衆。並乘
五色瓊輪。琅輿碧輦。九色玄龍。十

絕羽蓋。麟舞鳳唱。嘯歌嚶嚶。靈妃
散花。金童揚烟。讚謠洞章。浮空而
來。是時梵天一切金仙。大乘菩薩。
四衆八部。承斯光照。皆乘碧霞。九
靈流景。飛雲玉輿。慶霄四會。三辰
吐芳。飛香八湊。旋遶道前。雨衆妙
花。如雲而下。遍覆會前。是時其光。
遍照諸天下。燭下方。無極世界。同
玄都境。凡彼人間。上近九天。通接
交連。至親至邇。凡彼下方。無極世

界。山陵坡坂。溝澗溪谷。緬平如掌。
六合至邇。三境非遼。天寶臺殿。星
羅人間。瓊瑰羅列。朗耀雲衢。七寶
欄楯。以界道路。玉樹仙花。蓓瓌珠
實。景秀丹田。芝草覆綿。時彼下方。
皆見諸天。鈞天妙樂。隨光旋轉。自
然振響。又復皆見。鸞嘯鳳唱。飛鳴
應節。龍戲麟盤。翔舞天端。諸天寶
花。零亂散落。遍滿道路。是時凡聖
駭異。幽暗開光。天人悅慶。踊躍懽

忻。凡夫學士。盡得飛昇。仰觀劫仞
寶臺。俯眇紫雲彌羅。是諸世界。一
切人民。咸臻道炁。白首面皺。皆得
化度。紺髮朱顏。少壯幼稚。轉得形
容光澤。美好。苦惱痊平。普蒙解脫。
安樂快然。天下歌謠。欣國太平。當
爾之時。神風遐著。萬炁揚津。天震
地裂。枯骨更生。沉尸飛魄。皆起復
形。酆都鐵圍。長夜九幽。即時破壞。
地獄衆生。化生諸天。三惡道苦。一

時解脫。時諸罪輩。以斯光力。得生
十方。諸大天宮。爾時 玉皇。即分
其身。遍於十方。諸大天宮。令諸天
宮。自然化現。白玉為京。黃金為闕。
七寶玄苑。大光明殿。具光明座。幢
節幡蓋。異寶奇花。遍布是處。爾時
玉皇。即以所分之身。遍於是處。
白玉京中。黃金闕內。七寶玄苑。大
光明殿。光明座上。普為十方。演說
清淨解脫之道。時化玉帝。各以無

量天真大聖。妙行真人。靈妃玉女。侍列左右。是諸玉女。顏容姝妙。端嚴奇特。天珍異寶。莊嚴身相。言奇清徹。衆所樂聞。如是諸女。其身復出。微妙解脫。自然之香。是香芬馥。周遍諸天。極妙樂土。及餘大地。一切福處。六道一切衆生。聞是香者。普蒙開度。所謂天道。人道。魔道。地獄道。餓鬼道。畜生道。若諸天道。一切天人。或有能聞。是此香者。五衰

四相。永得除滅。轉增天福。若諸人
道。王臣兆庶。或有能聞。是此香者。
即得人天長壽之樂。身或滅度。乃
得脫殼尸解之道。若諸魔道。一切
諸魔。或有能聞。是此香者。安處天
宮。鬪戰之苦。各得休息。若諸地獄
道。一切衆生。或有能聞。是此香者。
離地獄苦。得淨土樂。若諸餓鬼道。
一切餓鬼等。或有能聞。是此香者。
即得飽滿。無饑渴惱。若諸畜生道。

一切畜生。或有能聞。是此香者。脫
畜生苦。得智慧樂。爾時。諸生天罪
衆。既得生。是勝天宮已。緣承慈光。
攝受之故。便得覺悟。各各明了。罪
福因緣。與諸眷屬。作天伎樂。來詣
帝前。是諸衆等。各各含悲。俱發聲
言。前後經千劫萬劫。不見三光。常
處黑闇。三惡道中。多受苦惱。伏蒙
玉帝。方便放光。愍救我等。皆生
天上。是諸惡業。悉皆滅盡。無諸繫

滯。皆得往生。仰朝玉帝。各到道場。是諸生天。一切罪衆。說是語已。稽首復位。爾時玉帝出大妙音。普告十方諸天聖衆。汝等諦聽。此諸罪輩。曠劫以來。縱無明性。造十惡業。六塵遍染。三業縈纏。肆意任心。曾無覺悟。陰罪陽過。日積月深。背道違真。順邪棄正。舉心運念。動結愆尤。遂使命過之後。身落三塗。不得解脫。若非今日。遇是法筵。何

由出離。爾時諸天化身。玉帝即

以神通。不動其所。移接天人。皆令

得至。清微天宮。玉清聖境。元始

會下。是諸衆等。不覺不知。是時

天尊。衆會見是十方。玉帝化身。

普皆來集。天尊會前。如無邊明

鏡。照諸影像。互相容入。時諸大衆。

稽首瞻仰。玉帝化身。聖中最尊。

增長清信。益加志樂。心無退轉。起

大堅固。時諸天人。邇得生天。忽覩

天尊勝會道場。清淨第一。無為
功德之所莊嚴。踊躍歡喜。一時作
禮。歎未曾有。爾時十方諸化玉皇。
俱復一體。從法席起。北向長跪。
天尊言曰。往昔去世。有國名號光
嚴妙樂。其國王者。名曰淨德。時王
有后。名寶月光。其王無嗣。嘗因一
日。作是思惟。我今將老。而無太子。
身或崩殒。社稷九廟。委付何人。作
是念已。即便敕下。詔諸道衆。於諸

宮殿。依諸科教。懸諸幡蓋。清淨嚴
潔。廣陳供養。六時行道。遍禱真聖。
已經半載。不退初心。忽夜寶月光
皇后夢。太上道君。與諸至真。金
姿玉質。清淨之儔。駕五色龍輿。擁
耀景旌。蔭明霞蓋。是時太上道
君安坐龍輿。抱一嬰兒。身諸毛孔。
放百億光。照諸宮殿。作百寶色。幢
節前導。浮空而來。是時皇后。心生
歡喜。恭敬接禮。長跪道前。白道

君言。今王無嗣。願乞此子。為社稷主。伏願慈悲。哀愍聽許。爾時。道君。荅皇后言。願特賜汝。是時。皇后。禮謝。道君。而乃收之。皇后收已。便從夢歸。覺而有孕。懷胎一年。于丙午歲正月九日午時。誕于王宮。當生之時。身寶光燄。充滿王國。色相妙好。觀者無厭。幼而敏慧。長而慈善。于其國中。所有庫藏。一切財寶。盡將散施。窮乏困苦。鰥寡孤。

獨無所依怙。饑饉癯殘。一切衆生。
仁愛和遜。歌謠有道。化及遐方。天
下仰從。歸仁太子。父王加慶。當爾
之後。王忽告崩。太子治政。俯念浮
生。告敕大臣。嗣位有道。遂捨其國。
於普明香嚴山中修道。功成超度。
過是劫已。歷八百劫。身常捨其國。
為羣生故。割愛學道。於此後經八
百劫。行藥治病。拯救衆生。令其安
樂。此劫盡已。又歷八百劫。廣行方

便啓諸道藏。演說靈章。恢宣正化。
敷揚神功。助國救人。自幽及顯。過
此已後。再歷八百劫。亡身殞命。行
忍辱故。捨已血肉。如是修行三千
二百劫。始證金仙。號曰清淨自然。
覺王如來。教諸菩薩。頓悟大乘正
宗。漸入虛無妙道。如是修行。又經
億劫。始證玉帝。說是語已。法筵
清衆。異口同聲。嘆未曾有。爾時衆
中。有一玉女。名曰夜光。從座而起。

嚴整衣冠。從容雅步。長跪道前。白
天尊言。臣宿昔何幸。仰侍御前。
親奉供養。已經億劫。三清境界。金
闕玉京。寂淡逍遙。快樂自在。嬉遊
聖域。餐聽法音。未嘗見此希有之
事。不審向來光內。所現十方諸天。
變現聖境。皆有玉帝。應化法身。
天真大聖。妙行真人。靈妃玉女。以
為侍衛。是諸玉女。相貌端嚴。形體
姝妙。出衆妙香。無與等者。復蒙

玉帝神通移接。今皆普集。在清微
天。未審今此玉女。以何因緣。得證
如是。無上色身。恩惟聖慈。示以未
悟。爾時。天尊。謂夜光玉女言。汝
固初入聖流。雖有智慧。未能明了。
此諸玉女。乃自往昔。無量劫中。修
諸妙行。具解脫門。同清淨信。同清
淨解。同清淨念。同清淨行。同清淨
身。同清淨心。同清淨意。同清淨果。
同清淨報。同大慈心。同大悲心。覆

護衆生。如母撫念。愛於赤子。奉戒
專一。冥心大道。清齋弘誓。千萬劫
中。尊奉玉帝。此諸玉女。非實是
女。皆天至真。為度羣生。現玉女身。
是故身色。神通智慧。隱顯變化。與
帝同焉。爾時夜光。聞是說已。心得
開悟。稽首歡喜。默然復位。爾時高
虛清明天主。與諸天眷屬。馭八景
鸞輿。蔭九光寶蓋。奏玄歌妙樂。詠
無量洞章。散天寶花。噴天真香。飛

步遊空。來詣道前。承天尊玉
帝威神之力。是諸寶花。即於空中。
化一寶蓋。蔭覆大衆。無不周遍。是
時高虛清明。天主見此希有。稽首
長跪。白天尊玉帝言。賤臣懈

怠。後會法筵。今日吉慶。興此法橋。
幽顯聖凡。普霑聖澤。放大光明。現
希有相。上照諸天。四梵六慾。一切
樂土。諸真聖衆。覩此光明。悉皆雲
集。下照下方。無極世界。同玄都境。

近接九天。靈風奏樂。宮商相和。激
朗雲庭。皆成洞章。一切衆生。咸臻
道化。酆都鐵圍。長夜九幽。一切地
獄。受苦衆生。盡承光力。皆生諸天。
得受快樂。今日所散天寶奇花。旋
結成蓋。遍覆大衆。盡乃斯光。威神
之力。臣等千劫良因。九天運會。皇
道蕩蕩。正法興隆。今日大吉。咸仰
玄功。是時高虛清明天主。以偈讚
玉帝曰。

金闕玄穹主

高上玉皇尊

妙相冠諸天

慈光燭三界

真聖妙道師

天人依仗師

大乘垂法語

真一指迷途

功德若虛空

讚揚無窮盡

是穹蒼主。浩劫之尊。妙見妙知。無
等無倫。湛寂真靜。杳亡杳存。上聖
上靈。大神通。光明藏。大丈夫。開化
人天。教道無窮。大慈大悲。流煥法
輪。為度羣生。是號玉皇。穹蒼真

老。妙圓清淨。智慧辯才。至道至尊。
開度衆生。故演是光。爾時高虛清
明天主。說偈讚嘆已。天尊普告四
衆云。是 帝身。即道身也。非常體
也。是無量功德之身。是清淨自然
之身。是神明堅固。不壞真空。無上
法身。威靈恢廓。名聲周遍。無幽不
開。神奇堂堂。難可稱焉。是 帝非
有。為功德之所熏修。而 帝昔雖
下生人間。多劫行化。示大神通。而

身清淨。未嘗不在金闕。分身變化。應現隨方。利濟羣生。超昇道岸。普垂教法。開悟後人。依按奉行。登真成道。以斯功德之所莊嚴。是故光明。常充諸天神智。妙達莫可度量。是身光明。皆具妙號。所謂大神通光。大慈悲光。大喜捨光。大忍辱光。太平等光。大柔和光。大自在光。大利益光。大如意光。大智慧光。大吉祥光。大解脫光。大歸依光。大功德。

光大圓滿光。大無礙光。無能勝光。
是故汝等欲見是帝。乃不可得。
者。緣以汝等尚於身口。不捨結習。
煩惱行業。由是障故。不能得覩。是
帝慈顏。吾今爲汝。時會衆等。宣

示斷障之法。汝等大衆。宜各奉行。
時諸大衆。不勝喜躍。各於至尊
几前。稽首作禮。俱欲願聞。天尊
言曰。斷障之法。當生大悲。無起疑
惑。無起貪嗔。無起淫慾。無起嫉妬。

無起殺害。無起凡情。無起凡思。無起貪妬。無起聲色。無起是非。無起憎愛。無起分別。無起高慢。無起執著。凝神澄慮。萬神調伏。心若太虛。內外貞白。無所不容。無所不納。無令外邪亂其至道。牽失真宗。敗其靈根。盜其至寶。致爾萬劫。永墮凡流。透入俗網。萬魔來攻。百千萬劫。不聞妙法。鬼神執誅。從生入死。是故汝等。應當志心。善護真宗。無令

喪失。如前所說。如是諸障。汝等各當除斷之。身得清淨。超度諸難。是名道寶。持法棟梁。更當修奉。是此經典。如近是帝。生尊重心。著想尊容。稱揚名號。然後汝等得覩慈顏。咸蒙護度。普聞妙法。親奉供養。永無流傳。是時四衆。聞已歡喜。歎未曾有。

太上洞玄靈寶高上玉皇本行集經卷上

高上玉皇本行集經

卷二



太上洞玄靈寶高上玉皇本行集

經卷中



太光大光明圓滿大神咒品第

二

爾時 天地始祖五老上帝稽首

長跪白 天尊言伏聞 高上玉

皇慈念蒼生普放神光照諸法界

六凡四聖普叨道蔭竊以凡夫短

景劫運將終正道宜行以濟兆民

使修真之子有期輕舉末代烝民

俱獲壽考。自昔元始洞玄靈寶赤書玉篇真文。生於元始之先。空洞之中。天地未根。日月未光。幽幽冥冥。無祖無宗。無氣無象。無色無名。無形無緒。無音無聲。混沌太無。靈文菴藹。乍存乍亡。二儀待之以分。大陽待之以明。靈圖革運。玄象推遷。乘機應會。於是存焉。玉帝授臣靈寶秘篆。大不可思議神咒。故天地得之而分判。三景得之而發。

光。靈文鬱秀。洞映上清。發乎始青
之天。而色無定方。支勢曲折。不可
尋詳。元始鍊之。於洞陽之館。冶之
於流火之庭。鮮其正文。瑩發光芒。
洞陽炁赤。故號赤書。靈圖既煥。萬
帝朝真。飛空步虛。旋行上宮。燒香
散花。口詠靈章。是時天降十二玄
瑞。地發二十四應。上慶九天之靈
輿。讚三天之寶明。神風既鼓。皇道
咸暢。元始登命。太真按筆。玉妃

拂筵鑄金為簡。刻書玉篇。五老掌錄。秘於九天。靈都之館。玉女典香。太華執巾。玉童侍衛。玉陛朝軒。九天上書。非鬼神所聞。故天寶之以致淨。地秘之以致安。五帝掌之以得鎮。三光乘之以高明。上聖奉之以致神。高尊賞之以致真。五嶽從之以得靈。天子得之以致治。國祚享之以太平。實靈文之妙德。乃天地之玄根。威靈恢廓。普加無窮。蕩

蕩大化。為神明之宗。其量莫測。魏
魏乎太空。明真有格。今當以行。是
時。元始革運。玄象開圖。靈文鬱
秀。神表五方。分判天地。開化萬靈。
此大宗之業。可得暫披。於靈輶乎。
今皇道敷暢。澤被十方。仰觀劫運。
真風宜行。臣私心實欲。使雲廕八
遐。風灑蘭林。寒條仰希華陽之繁。
朽骸蒙受靈澳之津。仰對元慈。
下伸丹懇。惟願哀憫。俯念蒼生。不

審靈寶玉篇真文可得見授下教
於未聞者乎。於是元始天尊撫
几高抗。凝真遐想。觀時已至。普謂
時會。一切真聖。論定陰陽。推數劫
會。移校河源。檢錄天度。選擇種人。
指拈太無。嘯朗九玄。永無開聽於
陳辭。有若閉礙。求真之路。是時
五老上帝。啓問不已。良久元始
天尊。乃垂盼貳之容。慨爾歎曰。微
乎深哉。子今所叩。豈不遠乎。此元

始靈寶之玄根。空洞自然之真文。生天立地。開化神明。施鎮五嶽。安國康民。靈寶玄妙。為萬物之尊。天發玄瑞。靈應自然。今三天整運。六天道行。雜法開化。當有三萬六千種道。以擇來者之心。此法運訖。三龍之後。庚子之年。雜氣普消。諸天慶會。吾真道乃行。今且可相付。當錄於上館。未得行於下世。玄科有禁。不得便傳。子可詣靈都紫微上

宮。視天音於金格。取俯仰於神王。然後當使得備天文。以總御元始之天也。於是五老上帝與諸真聖。清香執戒。徘徊雲路。嘯命十天。上詣上清。太玄玉都。寒靈丹殿。紫

微上宮。受俯仰之格。乃知天真貴重。難可即聞。還乃更詣元始天尊。諮以禁戒之儀。遜謝不逮。是時天尊慈顏愍喻。靈闕廓開。登命五老上帝。開洞陽玉館。披九光

八色之韞。雲錦之囊。出元始靈寶
赤書玉篇真文。金書玉篆。微妙秘
密。運御乾坤。大光明圓滿大神咒
玉章。以付五老上帝。及諸真聖。
使依玄科。按法以傳。

是時。東方安寶華林。青靈始老。蒼
帝所受。神咒誥命。

東方九炁

始皇青天

碧霞鬱壘

中有老人

總校圖錄

攝炁舉仙

歲星輔肝

角亢鎮真

氏房心尾

四景廻旋

箕主七辰

玉斗明輪

承炁捕非

掃除災羣

東山神咒

攝召九天

赤書符命

制會艷山

束魔送鬼

所誅無蠲

悉詣木宮

敢有稽延

下制東河

溟海水神

大劫洪災

蛟龍負身

水府開道 通逕百千

上帝赤文 風火無間

右 玉皇誥命。以錫東方安寶華
林。青靈始老。蒼帝九炁天君。令統
御東方諸天諸地。日月星宿。名山
靈洞。水府泉宮。上聖高尊。真仙聖
衆。一切威靈。符命所臨。如誥奉行。
南方梵寶昌陽丹靈真老。赤帝所
受神咒。誥命。

南方丹天 赤帝玉堂

中有大神

號曰赤皇

上炎流煙

三炁勃光

神仙受命

應會太陽

熒惑輔心

井鬼守房

柳星張翼

抗御四鄉

軫總七宿

迴轉天常

召運促會

正道驛行

赤文命靈

北攝鄧山

束送魔宗

斬滅邪根

符教所討

明列臯原

南山神咒

威伏八方

羣妖滅爽

萬試摧亡

南河水帝

太伯龍王

神咒流行

普掃不祥

洪水飛灾

上召蛟龍

開除水逕

千道萬通

敢有干試

攝送火宮

赤書所告

莫有不從

右

玉皇誥命。以錫南方梵寶昌

陽。丹靈真老。赤帝三炁天君。令統

御南方諸天諸地。日月星宿。名山
靈洞。水府泉宮。上聖高尊。真仙聖
衆。一切威靈。符命所臨。如誥奉行。
中央寶劫洞清玉寶元靈元老。黃
帝所受神咒誥命。

中央總靈 黃上天元

始生五老 中皇高尊

攝炁監真 總領羣仙

典錄玄圖 宿簡玉文

催運上炁 普告萬神

鎮星輔脾

迴度北元

魁魁主非

截邪斬根

魍魎魍魎

掃穢除氛

魍正玄斗

明度天關

九天符命

金馬驛傳

敕攝北帝

遏塞鬼門

剪除不祥

莫有當前

中山神咒

召龍上雲

制會黃河

九水河源

不得怠縱

善惡悉令

千妖萬姦。上對帝君。

敢有干試。太陽激憤。

赤書玉字。宣告普聞。

右。玉皇誥命。以錫中央。寶劫洞。
清。玉寶元靈元老。黃帝一炁天君。
令統御中央。皇天后土。日月星宿。
名山靈洞。水府泉宮。上聖高尊。真。
仙聖衆。一切威靈。符命所臨。如誥。
奉行。

西方七寶金門。皓靈皇老。白帝所。

受神咒誥命。

西方素天

白帝七門

金靈皓映

太華流氛

白石我我

七炁氤氲

上有始生

皇老大神

總領肺氣

主校九天

檢定圖錄

制召上仙

太白檢肺

奎婁守塊

胃鼎畢觜

主制七關

參總斗魁

受符北元

赤書玉字

九天正文

攝召萬炁

普歸帝君

西山神咒

八威七傳

符水上龍

召山送雲

在所校得

同到帝門

輔衛上真

斬滅邪源

若有不祥

截以金關

赤書符命

風火驛傳

右

玉皇誥命。以錫西方七寶金

門。皓靈皇老白帝七炁天君。令統

御西方。諸天諸地。日月星宿。名山
靈洞。水府泉宮。上聖高尊。真仙聖
衆。一切威靈。符命所臨。如誥奉行。
北方洞陰朔單。鬱絕五靈玄老。黑
帝所受神咒。誥命。

北方玄天 五炁徘徊

中有黑帝 雙皇太微

總領符命 仙鍊八威

青裙羽襪 龍文鳳衣

上帝所舉 制到玉階

北辰輔腎

斗牛衛扉

女虛危室

豁落四開

辟總七星

執凶糾非

却灾掃穢

明道動輝

北山神咒

激陽起雷

流鈴煥落

攫天鎮威

北豐所部

萬妖滅摧

九河傾訖

烏母群飛

蛟龍通道

水陌洞開

赤文玉書

驛龍風馳

右 玉皇誥命。以錫北方洞陰朔
單。鬱絕五靈玄老。黑帝五炁天君。
令統御北方諸天諸地。日月星宿。
名山靈洞。水府泉宮。上聖高尊。真
仙聖衆。一切威靈。符命所臨。如誥
奉行。

道言是大神咒者。元始之妙言。
玉皇之真誥。上清自然之靈書。九
天始生之玄札。空洞之靈章。上聖
之祕語。玉宸之尊典。成天立地。開

張萬真安神鎮靈。成生兆民。匡御
運度。保天長存。上制天機。中檢五
靈。下策地祇。嘯命河源。運役陰陽。
召神使仙。此至真之妙文。神應自
然。致天高澄。令地固安。保鎮五嶽。
萬品存焉。玉帝昔授五老上
帝。是時五帝跪捧其章。祕題靈都
之館。天真皇人。昔書其文。掌之於
上清真境。太玄玉都。寒靈丹殿。紫
微上宮。累經劫運。而其文保固天

根。無有毀淪。與運推遷。是大神咒。
混之不濁。穢之愈清。毀之不滅。滅
之極明。大有之文。天真所尊。自無
金名帝圖。刻簡來生。斯文隱秘。不
得闕聞。有得之子。保萬烝長存。勤
行修奉。刻致神仁。

洞玄靈寶玉皇功德品第三

爾時。玉虛上帝。白。天尊言。惟
願慈悲。願為四衆帝釋等。及四梵
天王。一切諸天。一切諸仙。及未來

一切衆生。持是經人。說利益事。爾時。天尊告。玉虛上帝言。快哉斯問。不亦善乎。汝以慈悲。愍念衆生。故請問於我。天尊言曰。若有三界十方。無量國土。及國王大臣。或兵戈並起。疫氣大行。水旱蟲蝗。凶灾饑饉。是其國君。后妃太子。宰輔大臣。當發慈悲。為其黎庶。遍敕國內。州縣鎮宰。令諸道流。清淨嚴潔。于其觀內。設大齋醮。六時行道。

為轉此經。當得國土清平。五穀豐熟。黎庶安泰。若復有人。入諸山林。遇毒惡獸。但能存想。一念真經。山神衛護。猛獸自退。終不害已。若入江入海。採寶求珍。值遇惡風。如法持念。是此真經。風浪頓止。安穩達岸。若在軍陣。戈戟既接。兩刃相交。存心默念。是此真經。是諸惡賊。悉自退散。若在牢獄枷鎖之中。淨心定慮。存念真經。冤枉自伸。即得解。

脫。若為邪精鬼賊。衆苦所加。如法持念。是此真經。衆邪遠避。自然除愈。若人為求嗣息。如法尊重持念此經。帝敕天曹。明檢丹籍。九品之內。四果仙人。運應數合。謫降下生。為其作子。才辯明慧。人中尊貴。若婦人臨難之月。如法持念。是此真經。即得母子平安。生福德男女。人所愛敬。若為求官進職。爵祿亨達。貴遇人君。如法持念。是此真經。

即得職務遷轉。子孫榮遇。世世不絕。若人欲求資財殷富。如法奉持。是此真經。即得財寶充溢。衣食自然。慶流子孫。傳之萬世。若人被諸惡星之所照臨。困苦牀枕。如法持念。是此真經。是諸惡星返降吉祥。若人命過。應入地獄。注名惡籍。父母師長。夫妻男女。當為亡人持念真經。或安置道場。幡花供養。即得亡者。鬼籍盡除。神生淨土。同苦罪。

衆咸蒙護度。承斯勝利。皆生天上。又此經所在之處。常有十天至真大聖。無極飛天神王。侍衛供養。持是經人。當得自稱為正一真人。是人在處。自得十方至真至聖。金剛力士。潛護其人。如護己身。若出若入。遊行之處。百邪避路。魔鬼殄除。精靈伏藏。一切灾殃。不能侵近。是持經人命欲終時。更不見諸地獄惡相。即見天宮。一切玉女。持幢下

迎。而生天上。如天福盡。下降人間。即得千生萬生中。常為帝主。令國土清平。人民樂業。兼得為王。獲宿命通。遵奉大道。展轉修持。至登道岸。是持經人。獲福如是。又若有持是經人。若雨下時。起大悲心。如法向空。念此經三卷一遍。其雨所霑。一面所向方。一切衆生。五逆十惡。一切重罪。悉皆消滅。一切重病。便得痊愈。是諸衆生。命終之後。不墮地。

獄。神生淨土。蓮花化生。何況持是經者。又若有持是經人。若行於道路。值大風起。吹是持經之人。觸身之塵。是塵所霑。一切衆生。一切惡業。悉皆滅盡。更不墮三惡道。當生天上。故知持經功德。不可思議。是持經人。若在江。在河。在海。沐浴其身。是水所霑。其中衆生。魚鼈黿鼉。一切水族。是諸衆罪。悉得除滅。盡此一報之身。命過之後。更不受胎。

卵濕化。一切等身。是持經人。口出
一切語言。或善或惡。一切天魔外
道。聞者皆是清淨法音。是持經人。
若遇諸神廟。能為其神。誦詠是經。
是諸鬼神。得聞是經。即脫鬼趣。登
真仙道。恭敬是人。如奉是帝。若
人在世。不孝父母。不敬三寶。殺生
偷盜。邪淫妄語。作種種極重罪業。
將命終時。若有道心。正信衆生。于
其亡者。未氣斷時。起大悲心。於其

頭邊念

帝尊號。或一七二七三

七四七乃至百遍千遍。是其亡者。生前所造。諸不善業。悉得消滅。更不墮諸惡趣。神昇九天。何況受持。是此經者。又若復有人。自從往劫。乃至今身。輪轉人天。漂沈世域。積千愆萬過。在於已身。若遇是持經人。影暫映其身。如為帝光之所攝受。或與同語。或聞其聲。如奉帝言。道語慰諭。彼人罪障。永得除

滅。又若持是經人。造作長幡。書帝名號。于其幡上。懸諸長竿。或是觀字。或在家庭。是幡被諸風吹。所指方面。一切衆生。皆需勝利。一切惡業。悉得除滅。又若有持是經人。書

帝名號。在一切有聲物上。或鐘或磬。鈴鐸。鐃鈸。一切道具。法事之屬。或以道場。或以戲擊。或被風觸。是聲出時。或遠或近。一切衆生。聞是聲已。所有罪障。悉得清淨。又若

有持是經人。了悟生死。深入山林。修真學道。或時登臨。上山顧望。目所及處。山林溪谷。含生品類。有形無形。胎卵濕化。動植飛潛。種種諸類。所有罪業。永得除滅。身心清淨。命終生天。何況受持是此經者。當知是人。即是道藏功德身也。爾時天尊。謂玉虛上帝言。今我畧說。未盡其妙。若廣說之。凡流邪見。疑惑不信。是經功德。窮劫難言。爾時

玉虛上帝。聞是說已。心生歡喜。
不勝踊躍。瞻仰慈顏。稽首讚歎。
而作頌曰。

九天之上 謂之大羅

玉京金闕 雲層峨峨

中有天帝 仁慈惠和

至道無敵 降伏衆魔

天寶靈符 玉律金科

神仙億萬 幢幡衆多

聞者罪滅 永出愛河

是號玉皇

穹蒼真老

妙圓清淨

智慧辯才

至道至尊

三界師

混元祖

無能勝主

四生慈父

高天上聖

大慈仁者

十號圓滿

萬德周身

無量度人

拔生死苦

爾時


玉虛上帝。說是頌。及十號

已。是諸天衆。異口同音。歎未曾有。

太上洞玄靈寶高上玉皇本行集經卷中

高上玉皇本行集經

卷三



太上洞玄靈寶高上玉皇本行集
經卷下

天真護持品第四

爾時 昊天上帝聞說經法。從座而起。長跪 帝前。白言玉帝。願為

大衆及諸人天。持是經人。說利益事。爾時 玉皇尊帝。興方便意。開利益門。宣玉匱科。傳靈寶法。告於 昊天上帝言。汝今諦聽。當為汝說。受持功德。扶危拔苦。利益存亡。



神妙之事。衆真稽首。俱發聲言。弟子臣等。今日幸聞湛然常住之法。莫不上福三界諸天。下消三塗毒害。惟願慈悲。愍臣等故。演斯妙義。玉帝告曰。若有衆生。孝養父母。恭敬三寶。竭忠於君。不殺不盜。不淫不妬。不瞋不恨。不驕不詐。奉戒持齋。冥心大道。生尊重心。持誦是經。我即敕下周流沙界。遍傳十方。無極世界。我敕東方東華帝君。青

騎神仙兵馬。無鞅數衆。悉令下降。覆護受持。是此經者。我敕東南。扶桑大帝。與其部衆。神仙兵馬。無鞅數衆。悉令下降。覆護受持。是此經者。我敕南方。朱陵大帝。赤騎

神仙兵馬。無鞅數衆。悉令下降。覆護受持。是此經者。我敕西南。太華元老。與其部衆。神仙兵馬。無鞅數衆。悉令下降。覆護受持。是此經者。我敕西方。皓靈皇老。白騎神

仙兵馬。無鞅數衆。悉令下降。覆護受持。是此經者。我敕西北。皇天

上帝。與其部衆。神仙兵馬。無鞅數衆。悉令下降。覆護受持。是此經者。

我敕北方。紫微帝君。黑騎神仙

兵馬。無鞅數衆。悉令下降。覆護受持。是此經者。我敕東北。冲虛天

君。與其部衆。神仙兵馬。無鞅數衆。悉令下降。覆護受持。是此經者。

我敕中央。天皇大帝。崑崙蒼老。黃

騎神仙兵馬。無鞅數衆。悉令下降。覆護受持。是此經者。我敕上方。來和天君。名山大洞。神仙兵馬。無鞅數衆。悉令下降。覆護受持。是此經者。我敕下方。一切金仙。四衆八部。及諸眷屬。悉令下降。覆護受持。是此經者。我敕十方。飛天神王。飛天大神。三官四聖。二曜九星。北斗南斗。東西中斗。二十八宿。周天衆星。金剛力士。神王等衆。各與

部衆悉令下降。覆護受持。是此經者。我敕降魔力士。四天門王。五嶽四瀆。及餘諸山。四海九江。十二河源。山林川澤。一切主者。令與眷屬。覆護受持。是此經者。諸險惡處。令得安穩。我敕所在一切土地。靈官。并溝渠等。一切諸大力鬼王。皆令覆護受持。是此經者。令衆魔外道。悉皆懾伏。潛形遁迹。高飛海外。遠避他方。如是山林社稷廊廟。

血食之賓。一切鬼神。當自消滅。五
方行病瘟疫鬼帥。諸惡鬼神。并風
王水怪。孽龍妖神。土精木魅。盡自
消滅。五虛六耗。夢寐乖常。野道咒
詛。蠱毒之類。皆自消滅。心欲願者。
一切如意。皆得滿足。是持經人。或
不依科教。未能脩齋。未具淨戒。以
能信受。尊重景慕。是此經典。並同
脩齋護淨戒者。是人功德。坦然無
礙。自在逍遙。號人中聖。德惠長新。

同諸真人。爾時。昊天上帝。聞是
說已。即於帝前。乃為歌曰。

大哉至道。無形無名。

渺渺億劫。黃道開清。

神清朗耀。九魂吐精。

玉虛澄輝。太霞高明。

玉皇開化。溥度天人。

三元道養。二象攝生。

朽樹故根。已枯使榮。

蠢動蛸息。長生化形。

懷胎含孕

俱得生成

亡者命過

魂歸三清

魄受鍊度

南宮飛昇

今日大吉

皆得光明

五帝鑒映

普告萬靈

天神地祇

及與河源

五嶽四瀆

及諸名山

洞玄洞虛

洞空洞仙

無極大聖

至真尊神

無窮無極

普監度生

惡根斷絕

玄都記名

衆真班列

咸聽帝言

經是帝敕

保誦持人

至度道岸

無使災侵

我奉帝命

一切咸聽

爾時

昊天上帝。說是歌已。告大

衆言。此

玉皇妙法語。諸聖祕密

言。路絕道斷。微妙難思。巍巍大範。

為神明之宗。保鎮國土。拔度生死。

爾時

昊天上帝。說是語時。法筵

清衆咸仰道言。溥得開悟。于是
天尊而說偈曰。

玉帝功德大

玄理極幽深

生於浩劫前

運化於古今

我今說妙經

愍念諸有情

此誠極妙法

功德中功德

名號最上乘

為比為第一

大光明王尊

威德聖希有

能破暴惡魔

皆令心降伏

能滅極重罪

皆令得清淨

若人聞是經

或聞是帝名

稽首生恭敬

一切罪消滅

十惡四重罪

五逆害父母

信心一稱名

隨聲盡消滅

保護人天衆

四相與五衰

三塗極重苦

人間見厄難

凶年饑饉喪

毒藥及厭魅

刑獄與冤家

軍陣鬪戰苦

山林惡道中

虎豹豺狼等

江海毒龍類

迅雷風雨雹

水火及盜賊

蠱毒所中心

失志發狂亂

蛇蝎毒惡蟲

邪魔凶怪神

伺求人便者

由持是真經

普皆自散滅

惡病久沉綿

夢寐亦不安

非理欲殘命

殄滅不為殃

緣遇是經故

安穩得自在

所有希求願

財寶及富貴

以此經功德

如意皆稱遂

神威自在仙

衆德十一曜

三十二天主

二十八宿王

靈妃玉女等

天神及地祇

三界虛空神

江海諸龍王

水火及風神

宮殿與宅舍

山林樹木衆

溝渠井泉神

由持是經故

一切皆擁護

衣食常自然

子孫居富貴

出言人希聞

所至皆恭敬

若為求男女

持誦此真經

帝詔下天曹

落籍天仙人

謫降生其家

為其作男女

顯貴人崇重

七祖盡昇仙

光大慶其門

延及父母親

吉祥常熾盛

灾障不能侵

是故我今說

大衆宜諦聽

慈悲度一切

皆令達上清

于是 天尊普告四衆。凡人持念

此經。受持 帝名。皆道根深重。宿

有善緣。此經尊妙。普度天人。但精

心恭奉。家國安寧。保命度灾。掃諸

不祥。天子王侯得奉之者。致國
太平。凶寇自夷。邊域不爭。兆民歌
唱。普天興隆。運推數周。正道當行。
有得之者。天真妙重。祕之祕之。
洞玄靈寶報應神驗品第五

爾時慈悲度厄真人。尋聲救苦真
人。濟生度死真人。萬福護身真人。
俱從座起。越班而出。俱白。天尊
言。若諸世末凡夫。雖宿有善緣。得
遇是經。被諸邪障之汙。本末疑惑。

不信是經功德。如是之人。見在過去。於諸地獄。得何罪報。惟願聖慈。說其報應惡趣之苦。是時。天尊。謂四真人云。若諸世間。剛強暴惡。不善衆生。終日竟夜。對諸道像。無恭敬心。出誹謗語。是罪當墮五無間獄。若得值遇。是持經人。設諸方便。誘引勸諭。如是之人。暫滅惡心。信向是經。彼人罪業。淨盡無餘。又若有邪見愚執惡人。覩持是經。生

諸惡逆。偏眼邪視。乃至起一惡心。
發一惡言。謗讟如是持經之人。其
罪過是。命終之後。墮大地獄。永無
出期。何況世間衆生。得遇是經。不
生敬仰。穢手汙觸。葷口讀誦。牀榻
不淨。便將安置。或讀是經。講習俗
語。共同戲笑。以為常典。如是之人。
命過之後。墮無間獄。永無出期。殃
緣九祖。受拷。酆都累及後世。害纏
子孫。是人于地獄中。歷無量劫。受

大苦惱。遇無邊聖。累承救拔。罪惡
小減。又遇聖人。救拔得出。生餓鬼
中。歷千萬劫。不聞漿水之名。鬼報
得出。生畜生中。畜生報出。若生人
中。更生邊夷外道。而復女身。貧寒
困苦。癰殘百病。受無量苦。人所棄
擲。求生不得。求死不得。輕斯經故。
獲罪如是。又若復有人。初雖信受。
後復慢易。善惡童子。上奏三官。黑
簿添名。青編減筭。身歿之後。拘閉

幽牢。往復三塗。無由解脫。或於見
世。受種種病。疥癩癰疽。以為莊嚴。
憂悲苦惱。日夜相煎。而身或被橫
惡所加。或牢獄繫鎖。非分自害。悞
食毒藥。或被虎狼毒蛇之所食噉。
或為冤家之所讎對。或行山林。值
遇惡人。被他屠割。推落崖岸。或被
邪精魍魎之所殘害。或值水火之
所焚漂。或被刀兵之所橫誅。輕斯
經故。橫喪天年。獲如是果。獲如是

報。可不悲歟。可不痛歟。故報汝等。
依此奉行。勿生邪念。若諸念不生。
萬緣頓息。塵沙惡業。随心消散。一
切灾魔。自然殄滅。此之功德。不可
思議。是誠無比最上妙法。諸經之
王。有大利益。非人勿示。若諸天人。
五衰四相。輪迴侵逼。能捨除妄想。
受持是經。坐招自然。天福益固。身
度三界。與道長存。是此經典。無與
等。無能勝。是大威德。大神咒。能令

一切枯槁。便生枝葉。花果茂盛。能除衆生。極重苦惱。能令短命衆生。而得長壽。此經功德。不可思議。歎莫能盡。若不宿植道種。廣種福業。乃至名字。亦不得聞。何況得見。是經依三洞真格。八萬劫一傳。此清都至真上聖所寶。祕於玉京。金闕宸宮。甚為微妙。難可得遇。此經。宿有仙骨。當為九天真仙之人。得遇斯文。承斯緣故。後當齋金寶。從師。

告盟受之。方當承機應運。乃可付
焉。不得輕泄。敬之慎之。於是
天尊重宣此義。為說偈曰。

設使江河水 波浪能生蓮

慈烏毛能白 如經故難遇

設使龜生毛 堪採為衣服

冬月能消冰 如經故難遇

設使蚊蠓足 堪構為舟橋

能載一切重 如經故難遇

設使黃口雀 能銜諸太山

擲之他方界

如經故難遇

設使一葉舟

力能載崑崙

浮渡於大海

如經故難遇

設使諸水蛭

口能生巨齒

其大如象牙

如經故難遇

設使蓬蒿葉

能覆無鞅界

廕庇無鞅衆

如經故難遇

設使烏梟類

同樹一巢棲

啣食共相飼

如經故難遇

設使兔生角

堪用為梯磴

上窮有頂天

如經故難遇

設使鼯鼠等

緣於兔角梯

至天能食月

如經故難遇

設使驢顏脣

色如蘋婆果

復能作歌舞

如經故難遇

設使蠅蟲等

能飲鍾石酒

迷荒而沉醉

如經故難遇

爾時

天尊宣說偈已。普告四衆。

是故持是經人。名功德身。一切有

情。被其廕故。持是經人。名神通身。

一切吉祥。咸臻集故。持是經人。名
清淨身。是諸惡業。不能侵故。持是
經人。名威德身。天魔異道。不能攝
故。持是經人。名無等身。上帝謠
唱。萬神敬故。持是經人。名堅固身。
惡劫大難。不能損故。持是經人。名
道藏身。口出語言。鬼神仰故。持是
經人。名慈悲身。六道衆生。賴其善
故。持是經人。名大道身。出入所在。
無怖畏故。持是經人。名良醫身。善

行妙法。安樂人故。持是經人。名光明身。常為帝光所攝受故。持是經人。名自在身。天宮妙境。神能遊故。持經功德。說不可盡。又若道士至人。能結壇誦經。著新淨衣。於夜半後。闐寂獨處。清淨室中。叩齒九通。東向端坐。誦詠是經。於是時也。太真御几。王妃拂筵。萬神班列。諸天臨壇。三界侍衛。五帝司迎。然後閉目靜思。存想是經。不覺身處五雲。

之內。俄見其身。光明赫奕。上昇天宮。衆真下迎。心有所請。一切應奉。仙丹妙寶。隨意自得。故當依科閉心奉行。此經乃至三世金仙。十方大聖。皆從此經。依按脩奉。故頓得超證。無上妙道。是此帝也。諸佛之師。衆聖之王。是故凡夫。值遇是經。致五帝輔翼。召使神仙。御役神官。運道陰陽。千靈敬仰。萬神懾伏。百邪避路。羣魔束形。命過之後。即

得南宮受鍊。飛步上清。逍遙自在。
與道長存。又設復世間衆生。曾聞
是經。心常渴仰。能於家中。擇清淨
處。畫帝尊像。日夜虔虔。晨昏濟
濟。香花燈果。尊重供養。稱名瞻禮。
是人當得三十種上妙功德。

一者諸仙讚重

二者先亡生天

三者宿殃解脫

四者所往通達

五者無盜賊事

六者所求遂心

七者除水火厄

八者橫事潜消

九者夜夢吉祥

十者疾病不臨

十一者智慧聰明

十二者人見歡喜

十三者衣食豐盛

十四者子孫榮貴

十五者六親見喜

十六者門族和睦

十七者除三惡報

十八者轉女成男

十九者形容端嚴

二十者為國大臣

二十一者生為帝王

二十二者鬼神欽仰

二十三者得宿命通

二十四者諸神護念

二十五者九族受廕
二十六者處世長年
二十七者有情賴善
二十八者魔王保迎
二十九者決超三界
三十者白日上昇

爾時天尊復告四衆。此經功德。
能碎鐵圍諸山。竭苦海水。破大地。
獄。拔重罪苦。降暴惡魔。護諸國土。
能滅一切惡鬼。能除一切重病。能

解一切惡毒。能離一切惡人。能伏一切毒獸。能摧一切邪道。一切諸天。皆令降伏。其餘功德。說不可盡。爾時道場大衆。金仙菩薩。真聖眷屬。聞是說已。歡喜踊躍。稽首敬禮。而作頌曰。

大哉至道 無宗上真
上度諸天 下濟幽魂
上無師祖 惟道為身
丹臺紫府 金闕玉京

秘此妙法 溥福含靈
滅我萬罪 增我遐齡
萬神朝禮 魔王保迎
功德昌盛 黃籙書名
渺渺億劫 使我長存
於是衆等。說是頌畢。稽首皈依。奉
辭而退。

太上洞玄靈寶高上玉皇本行集
經卷下終

無上玉皇心印妙經

上藥三品

神與氣精

恍恍惚惚

杳杳冥冥

存無守有

頃刻而成

迴風混合

百日功靈

默朝上帝

一紀飛昇

知者易悟

昧者難行

履踐天光

呼吸育清

出玄入牝

若亡若存

綿綿不絕

固蒂深根

人各有精

精合其神

神合其氣

氣合體真

不得其真

皆是強名

神能入石

神能飛形

入水不溺

入火不焚

神依形生

精依氣盈

不凋不殘

松柏青青

三品一理

妙不可聽

其聚則有

其散則零

七竅相通

竅竅光明

聖日聖月

照耀金庭

一得永得 自然身輕

太和充溢 骨散寒瓊

得丹則靈 不得則傾

丹在身中 非白非青

誦之萬遍 妙理自明

無上玉皇心印妙經

誦經後念十遍玉經纂補闕

志心皈命

金闕玄宮主。高上玉皇尊。諸佛聖
師。萬天帝主。演三卷五品之妙法。

周十號萬德之洪名。放十七大光明。示三十種功德。拔度生死。運化古今。一萬二千三十六字。洞玄靈寶。高上玉皇本行集經。

金書玉字妙難思

誦者天真必護持
三十願成皆仗此
志心歸奉莫教疑
回向懺悔文

龍章鳳篆。已殫歌咏之誠。鶴駕鸞

輿重冀鑒觀之惠。臣謹炷真香。重
誠奏啓。道經師寶元始萬神。玉

光會中一切聖真。恭望恩光重垂
證鑒。臣向來為某事人。看誦玉

皇本行集經幾部。敬保某事。所宣

經典。罔敢不虔。其柰業力障魔。神

志錯亂。所立根鈍。自然想來。脫畧

混殽。顛倒重疊。臨文徇意。字誤句

差。乖清濁之正音。泥解會之邪見。

事奪其志。心不在經。問對起居。斷

絕隔越久。誦懈怠。因事忿嗔。嚴潔
或涉於垢塵。肅敬或成於瀆慢。身
口服用之不淨。衣冠禮貌之不虔。
供弗如儀。處非其地。卷舒揉亂。墜
落脫傷。不專不恭。大慚大愧。伏願
慈悲憐憫。赦釋罪愆。庶使誦持得
臻感格。所祈所願。如志如心。尚慮
經中傳授。或誤刊寫。多訛其師。其
人悉皆懺悔。仗道威力。願罪消除。
常轉法輪。普度羣品。為如上緣。稽

首稱念

太上無極大道。

至真三十六部尊經真文寶符。

太上三尊十方衆聖玄中大法師。

玉經中無鞅數衆神仙。不可思

議功德



順治十四年四月

日

